

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савјет

RJEŠENJE

Prijava namjere koncentracije privrednog subjekta Aneks d.o.o. Banja Luka i privrednog subjekta Ki sistemi-Kompjuterski inženjering d.o.o. Prijedor

Sarajevo
februar 2009. godine



Broj: 01-05-26-044-12-II/08
Sarajevo, 11.02.2009. godine

Na osnovu člana 25. stav (1) tačka e), člana 42. stav (1) tačka d), a u vezi sa čl. 12., 14., 16., 17. i 18. Zakona o konkurenciji („Službeni glasnik BiH“, br. 48/05 i 76/07), rješavajući po Prijavi namjere koncentracije privrednog subjekta Aneks društvo za inženjering i konsalting eksport-import d.o.o. Banja Luka, Majke Jugovića 25, 78000 Banja Luka, Bosna i Hercegovina i privrednog subjekta Ki sistemi – Kompjuterski inženjering d.o.o. Prijedor, Kralja Petra I Oslobođioca 98, 79101 Prijedor, Bosna i Hercegovina, podnesene od strane advokata Seada Miljkovića, Fra Anđela Zvizdovića 1, 71000 Sarajevo, zaprimljenu dana 24.10.2008. godine pod brojem: 01-05-26-044-II/08, Konkurencijsko vijeće, na 83. (osamdesettrećoj) sjednici održanoj dana 11.02.2009. godine, je donijelo

R J E Š E N J E

1. Ocjenjuje se dopuštenom koncentracija na tržištu internet usluga (dial up i broadband internet) u regijama Banja Luka i Prijedor, koja će nastati sticanjem kontrole kupovinom osnovnih sredstava u privrednom subjektu Ki sistemi – Kompjuterski inženjering d.o.o. Prijedor, Kralja Petra I Oslobođioca 98, 79101 Prijedor, Bosna i Hercegovina, od strane privrednog subjekta Aneks društvo za inženjering i konsalting eksport-import d.o.o. Banja Luka, Majke Jugovića 25, 78000 Banja Luka, Bosna i Hercegovina.
2. Zbog dostavljanja netačnih informacija u postupku ocjene koncentracije u smislu člana 17. Zakona o konkurenciji, izriče se novčana kazna privrednom subjektu Aneks društvo za inženjering i konsalting eksport-import d.o.o. Banja Luka, Majke Jugovića 25, 78000 Banja Luka, Bosna i Hercegovina, u visini od 15.000,00 KM i odgovornom licu, direktoru Antonijević Nebojši (..) ¹ u visini od 5.000,00 KM, u smislu člana 49. stav (1) tačka c) i stav (2) Zakona o konkurenciji, koju su dužni platiti u roku od 8 (osam) dana od dana prijema ovog Rješenja.
3. Ovo Rješenje o koncentraciji se upisuje u Registar koncentracija.
4. Ovo Rješenje je konačno i biće objavljeno u „Službenom glasniku BiH“, službenim glasnicima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 24. oktobra 2008. godine pod brojem: 01-05-26-044-II/08, zaprimilo Prijavu namjere koncentracije (u daljem tekstu: Prijava) privrednog subjekta Aneks društvo za inženjering i konsalting eksport-import, d.o.o. Banja Luka, Majke Jugovića 25, 78000 Banja Luka, Bosna i Hercegovina (u daljem tekstu: podnosilac Prijave ili Aneks d.o.o. Banja Luka), podnesenu od strane ovlaštenog zastupnika advokata Seada Miljkovića iz Sarajeva (punomoć izdata u Banja Luci dana 20. oktobra 2008. godine), kojom privredni subjekt Aneks d.o.o. Banja Luka namjerava steći kontrolu nad osnovnim sredstvima privrednog subjekta Ki sistemi – Kompjuterski inženjering d.o.o.

¹ (..) * podaci se smatraju poslovnom tajnom u smislu člana 38. Zakona o konkurenciji

Prijedor, Kralja Petra I Oslobođioca 98, 79101 Prijedor, Bosna i Hercegovina (u daljem tekstu: Ki sistemi d.o.o. Prijedor).

Uvidom u podnesenu Prijavu utvrđeno je da ista nije potpuna i kompletna, u smislu člana 30. stav (1) Zakona o konkurenciji (u daljem tekstu: Zakon) i čl. 8., 9. i 10. Odluke o načinu podnošenja prijave i kriterijumima za ocjenu koncentracija privrednih subjekata („Službeni glasnik BiH“, broj 95/06), te je u skladu sa članom 31. Zakona Konkurencijsko vijeće zatražilo dopunu iste dana 10.11.2008. godine dopisom broj: 01-05-26-044-1-II/08 i dana 15.12.2008. godine dopisom broj 01-05-26-044-4-II/08. Podnosilac prijave je dopunio istu i traženu dokumentaciju dostavio dana 17.11.2008. godine dopisom broj: 01-05-26-044-2-II/08, dana 21.11.2008. godine dopisom broj: 01-05-26-044-3-II/08 i dana 19.12.2008. godine dopisom broj: 01-05-26-044-6-II/08.

Po prijemu tražene dokumentacije Konkurencijsko vijeće je utvrdilo Prijavu kompletnom i dana 30.12.2008. godine izdalo Potvrdu o prijemu kompletne i uredne Prijave broj: 01-05-26-044-9-II/08, u skladu sa članom 30. stav (3) Zakona.

Podnosilac Prijave je naveo, u smislu člana 30. stav (2) Zakona, da nema obavezu podnijeti zahtjev za ocjenu koncentracije nekom drugom tijelu ovlaštenom za ocjenu koncentracije izvan teritorije Bosne i Hercegovine.

Konkurencijsko vijeće u postupku ocjene dopuštenosti predmetne koncentracije je utvrdilo sljedeće činjenice:

Predmetna Prijava namjere koncentracije je podnesena u zakonom propisanom roku, u smislu člana 16. stav (1) Zakona.

1. Učesnici predmetne koncentracije

Učesnici koncentracije su privredni subjekt Aneks društvo za inženjering i konsalting eksport-import d.o.o. Banja Luka, Majke Jugovića 25, 78000 Banja Luka, Bosna i Hercegovina i privredni subjekt Ki sistemi – Kompjuterski inženjering d.o.o. Prijedor d.o.o. Prijedor, Kralja Petra I Oslobođioca 98, 79101 Prijedor, Bosna i Hercegovina.

1.1. Privredni subjekt Aneks d.o.o. Banja Luka

Privredni subjekt Aneks društvo za inženjering i konsalting eksport-import d.o.o. Banja Luka, Majke Jugovića 25, 78000 Banja Luka, osnovan je 1993. godine i registrovan u Osnovnom sudu u Banja Luci, pod brojem: 1-3645-00.

Pretežne djelatnosti privrednog subjekta Aneks d.o.o. Banja Luka su trgovina na veliko računarima, perifernom opremom i softverom, izrada softvera, ostale srodne računarske djelatnosti i pružanje usluga iz oblasti telekomunikacija, fiksne telefonske usluge i pružanje internet usluga.

U osnovnom kapitalu privrednog subjekta Aneks d.o.o. Banja Luka 70,0% udjela ima privredni subjekt Telekom Slovenije d.d. Ljubljana, Cigaletova 15, 1000 Ljubljana, Republika Slovenija (u daljem tekstu: Telekom Slovenije) i 30,0% udjela fizičko lice Nebojša Antonijević ((..)*, Banja Luka).

Djelatnosti privrednog subjekta Telekom Slovenije su pružanje usluga u oblasti telekomunikacija koja obuhvata usluge fiksne i mobilne telefonije, internet usluge, obradu podataka i distribuciju kablovskog interneta.

Privredni subjekt Aneks d.o.o. Banja Luka od strane Regulatorne agencije za komunikacije BiH ima izdatu dana 01. aprila 2002. godine Opštu dozvolu za pružanje internet usluga na cijeloj teritoriji BiH

(broj: DPIU-TS/001/02), dana 12. aprila 2006. godine dozvolu mrežnog operatora, te dozvolu za pružanje usluga u javnoj fiksnoj telefoniji od 08. maja 2006. godine.

Privredni subjekt Aneks d.o.o. Banja Luka prodaju računarske opreme i pretplate za dial up i broadband internet obavlja u svom sjedištu, a prodaju ostalih telekomunikacijskih usluga obavlja kanalima direktne prodaje.

1.1.1. Povezani privredni subjekti Aneks d.o.o. Banja Luka u Bosni i Hercegovini

Privredni subjekt Aneks d.o.o. Banja Luka je 100,0% vlasnik privrednog subjekta NETKOM društvo sa ograničenom odgovornošću za inženjering, usluge proizvodnje i trgovinu (u daljem tekstu: Netkom d.o.o. Banja Luka), Ranka Šipke 78, Banja Luka, registrovanog u sudskom registru Osnovnog suda u Banja Luci pod brojem 1-12729-00.

Osnovna djelatnost privrednog subjekta Netkom je pružanje usluga u oblasti telekomunikacija (kablovska distribucija radio i televizijskih programa).

Rješenjem Konkurencijskog vijeća broj: 01-06-26-021-5-II/08 od 24.07.2008. godine ocijenjena je dopuštenom predmetna koncentracija.

Telekom Slovenije postao je 100,0% vlasnik privrednog subjekta Blic.Net d.o.o. Banja Luka, čija je osnovna djelatnost pružanje internet usluga (Rješenje Konkurencijskog vijeća broj: 01-02-26-039-3-II/08 od 30.01.2008. godine), a nakon toga izvršeno je pripajanje privrednog subjekta Blic.Net d.o.o. Banja Luka privrednom subjektu Aneks d.o.o. Banja Luka i dana 02.07.2008. godine isto je registrovano u Osnovnom sudu u Banja Luci.

Privredni subjekt Aneks d.o.o. Banja Luka ima većinsku kontrolu nad osnovnim sredstvima privrednog subjekta Profel – komunikacije d.o.o. preduzeće za izradu i održavanje komunikacionih sistema, Petra Petrovića Njogoša 12/a, 79000 Prijedor, registrovan u Osnovnom sudu u Banja Luci, pod brojem: 1-15145-00, dana 11. oktobra 2005. godine, čija je pretežna djelatnost pružanje usluga iz sektora telekomunikacija (kablovska distribucija radio i televizijskih programa).

Rješenjem Konkurencijskog vijeća broj: 01-06-26-045-10-II/08 od 13.01.2009. godine dopuštena je predmetna koncentracija.

1.2. Privredni subjekt Ki Sistemi d.o.o. Prijedor

Privredni subjekt Ki sistemi – Kompjuterski inženjering je društvo sa ograničenom odgovornošću, sa sjedištem u Prijedoru, Kralja Petra I Oslobođioca 98, registrovano dana 01.08.1998. godine u Osnovnom sudu u Banja Luci, registarski uložak broj 1-10448-00.

Pretežne registrovane djelatnosti privrednog subjekta Ki sistemi d.o.o. Prijedor su trgovina na veliko računarima, perifernom opremom i softverom, izrada softvera i pružanje usluga iz oblasti telekomunikacije (internet usluge).

Prema podacima iz Prijave, fizička lica koja imaju po 25% vlasničkog učešća u privrednom subjektu Ki sistemi d.o.o. Prijedor su: Balaban Dragoslav ((..)*, Prijedor), Bijelić Vladimir ((..)*, Prijedor), Dražen Odicki ((..)*, Prijedor) i Nadan Lemeš ((..)*, Prijedor).

Privredni subjekt Ki sistemi d.o.o. Prijedor je nosilac Opšte dozvole za pružanje internet usluga na cijeloj teritoriji BiH (broj: DPIU-TS/037/03), izdate od Regulatorne agencije za komunikacije BiH dana 19.03.2003. godine.

Privredni subjekt Ki sistemi d.o.o. Prijedor ima razvijenu lokalnu mrežu distribucije za dial up internet uslugu i postoje tri lokalna distributera u Novom Gradu, Dubici i Kostajnici, a u Prijedoru prodaja pretplate za sve vrste internet usluga vrši se u sjedištu privrednog subjekta Ki sistemi d.o.o. Prijedor i u sjedištu privrednog subjekta Informa d.o.o. Prijedor.

Privredni subjekt Ki sistemi d.o.o. Prijedor pojedinačno ili zajedno nema više od 10,0% učešća u osnovnom kapitalu, odnosno 10,0% prava glasa u nekom privrednom subjektu u Bosni i Hercegovini.

2. Obaveza prijave namjere predmetne koncentracije

Obaveza prijave namjere koncentracije privrednih subjekata, u smislu odredbe člana 14. stav (1) Zakona, postoji ako ukupni godišnji prihodi učesnika koncentracije ostvareni prodajom roba i/ili usluga na svjetskom tržištu iznose preko 100.000.000,00 KM, po završnom računu u godini koja je prethodila predmetnoj koncentraciji.

Ukupni godišnji prihodi privrednih subjekata učesnika predmetne koncentracije (i njihovih povezanih privrednih subjekata), na dan 31. decembar 2007. godine, prikazani su u Tabeli 1..

Tabela 1.

Konsolidovani prihod (KM)	Telekom Slovenije	Aneks	Blic.Net	Netkom	Ki sistemi
Svijet	(..)*	(..)*	(..)*	-	(..)*
Bosna i Hercegovina	-	(..)*	(..)*	(..)*	(..)*

Konkurencijsko vijeće je prilikom utvrđivanja ukupnog godišnjeg prihoda učesnika koncentracije uzelo u obzir i godišnji prihod u iznosu od (..)* KM privrednog subjekta Telekom Slovenije, kao većinskog vlasnika privrednog subjekta Aneks d.o.o. Banja Luka sa godišnjim ukupnim prihodom od (..)* KM, a privredni subjekt Ki sistemi d.o.o. Prijedor ostvario je ukupan prihod u iznosu od (..)*, po završnom računu u godini koja je prethodila predmetnoj koncentraciji.

Budući da su učesnici koncentracije ispunili uslove u pogledu zajedničkog ukupnog godišnjeg prihoda i da je najmanje jedan privredni subjekt učesnik koncentracije registrovan na teritoriji Bosne i Hercegovine, u smislu člana 14. stav (1) Zakona, bili su obavezni podnijeti Prijavu.

3. Pravni okvir ocjene predmetne koncentracije

Konkurencijsko vijeće je u provođenju postupka ocjene dopuštenosti koncentracije primjenilo odredbe Zakona, Odluke o utvrđivanju relevantnog tržišta („Službeni glasnik BiH“, broj 18/06), te Odluke o načinu podnošenja prijave i kriterijumima za ocjenu koncentracija privrednih subjekata (Službeni glasnik BiH“, broj 95/06).

4. Pravni osnov i oblik predmetne koncentracije

Privredni subjekti Aneks d.o.o. Banja Luka i Ki sistemi d.o.o. Prijedor su, dana 16. oktobra 2008. godine u Banja Luci, zaključili Ugovor o kupoprodaji osnovnih sredstava (u daljem tekstu: Ugovor), kojim privredni subjekt Aneks d.o.o. Banja Luka namjerava steći kontrolu nad osnovnim sredstvima privrednog subjekta Ki sistemi d.o.o. Prijedor.

Navedenim Ugovorom privredni subjekt Ki sistemi d.o.o. Prijedor prodaje osnovna sredstva koja se odnose na pružanje internet usluga (računarska i satelitska oprema, linkovi, wireless bazne stanice i sl.).

Slijedom navedenog, namjeravana koncentracija podrazumijeva sticanje kontrole od strane jednog privrednog subjekta (Aneks d.o.o. Banja Luka) nad dijelom drugog privrednog subjekta (Ki sistemi d.o.o. Prijedor), u skladu sa članom 12. stav (1) tačka b) pod 1) Zakona.

5. Relevantno tržište predmetne koncentracije

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda (usluga) koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koje to tržište bitno razlikuje od uslova tržišne konkurencije na susjednim geografskim tržištima.

Analizom relevantnog tržišta učesnika koncentracije Konkurencijsko vijeće je utvrdilo da je relevantno tržište proizvoda u predmetnoj koncentraciji tržište internet usluga (dial up i broadband internet).

Relevantnim tržištem u geografskom smislu smatra se tržište regija Banja Luka i Prijedor s obzirom da privredni subjekt Ki sistemi d.o.o. Prijedor pruža internet usluge samo na regiji Prijedor, a privredni subjekt Aneks d.o.o. Banja Luka zajedno sa svojim povezanim društvom Blic.Net d.o.o. Banja Luka samo na regiji Banja Luka.

Slijedom gore navedenog, relevantnim tržištem predmetne koncentracije smatra se tržište internet usluga (dial up i broadband internet) na teritoriji regija Banja Luka i Prijedor.

6. Analiza relevantnog tržišta predmetne koncentracije u Bosni i Hercegovini

U analizi relevantnog tržišta učesnika predmetne koncentracije i njihovih glavnih konkurenata, kao i procjenama tržišnih učešća korišteni su kao relevantni podaci dostavljeni od Regulatorne agencije za komunikacije Bosne i Hercegovine (u daljem tekstu: RAK).

Tabela 2.

R.br.	Privredni subjekt	Regija Banja Luka		Regija Prijedor	
		%	Broj internet pretplatnika	%	Broj Internet pretplatnika
1.	Blic.Net d.o.o. Banja Luka	36,6	22.238	-	-
2.	Telekomunikacije RS a.d. Banja Luka – Telekom Srpske	24,5	14.863	30,9	2.160
3.	Preduzeće za poštanski saobraćaj RS-Spinter, Banja Luka	7,5	4.534	31,6	2.210
4.	Aneks d.o.o. Banja Luka	8,1	4.930	-	-
5.	Lanaco kompjuteri & komunikacije, Banja Luka	10,0	6.063	0,6	44
6.	Ki Sistemi d.o.o. Prijedor	-	-	35,7	2500
7.	Ostali	13,3	8.145	1,2	84
	Ukupno	100,0	60.773	100,0	6.998

Izvor: podaci RAK-a

U skladu sa podacima dobijenim od RAK-a zaključno sa 31.12.2007. godine u Bosni i Hercegovini bilo je registrovano 60 davaoca interent usluga, od kojih je 55 učestvovalo u redovnoj godišnjoj anketi, kojom je bilo obuhvaćeno ukupno 19 gradova-regiona, odnosno 81 grad u Bosni i Hercegovini (grupisanje po gradovima izvršeno je u skladu sa RAK Pravilo 8/2001) sa ukupnim brojem interent pretplatnika u BiH u iznosu od 273.752.

Takođe, prema podacima RAK-a, privredni subjekt Aneks d.o.o. Banja Luka zajedno sa svojim povezanim društvima prisutan je samo na regiji Banja Luka (koja obuhvata gradove: Banja Luka, Srbac, Čelinac, Kotor Varoš, Kneževo, Gradiška, Prnjavor i Laktaši) i ima ukupno 27.168 internet pretplatnika, a privredni subjekt Ki sistemi d.o.o. Prijedor prisutan je samo na regiji Prijedor (koja obuhvata gradove: Prijedor, Kozarska Dubica, Novi Grad i Kostajnica) i ima ukupno 2.500 internet pretplatnika.

7. Ocjena predmetne koncentracije

Konkurencijsko vijeće je, nakon procjene i analize podataka i utvrđenih činjenica u smislu člana 17. Zakona, u postupku donošenja predmetnog Rješenja, ocijenilo da neće doći do stvaranja dominantnog položaja učesnika koncentracije na relevantnom tržištu, obzirom da privredni subjekt Aneks d.o.o. Banja Luka zajedno sa svojim povezanim društvima do sada nije bio prisutan u regiji Prijedor, te da neće doći do značajne promjene tržišnog učešća, čime predmetna koncentracije ne sprečava, ograničava niti narušava tržišnu konkurenciju na relevantnom tržištu internet usluga (dial up i broadband internet) u regijama Banja Luka i Prijedor.

Uzimajući u obzir sve iznesene činjenice i podatke koji su prethodili donošenju predmetnog Rješenja, Konkurencijsko vijeće je ocijenilo predmetnu koncentraciju dopuštenom, u smislu člana 18. stav (2) tačka a) Zakona, kao što je odlučeno u dispozitivu ovog Rješenja.

8. Novčana kazna

Privredni subjekt Aneks d.o.o. Banja Luka je pri podnošenju Prijave naveo da je zajedno sa svojim povezanim privrednim subjektom Blic.Net d.o.o. Banja Luka u 2007. godini imao ukupno 11.500 internet pretplatnika, a privredni subjekt Ki sistemi d.o.o. Prijedor ukupno 1.000 internet pretplatnika.

U cilju definisanja relevantnog geografskog tržišta predmetne koncentracije, Konkurencijsko vijeće je od Podnosioca prijave zatražilo podatke o broju internet pretplatnika učesnika koncentracije za 2007. godinu, iskazan po opštinama.

Podnosilac prijave je, u svom odgovoru na navedeni zahtjev, naveo da je u 2007. godini privredni subjekt Aneks d.o.o. Banja Luka, zajedno sa svojim povezanim privrednim subjektom Blic.Net d.o.o. Banja Luka, imao 8.160 internet pretplatnika u gradovima Banja Luka, Laktaši i Čelinac, a privredni subjekt Ki sistemi d.o.o. Prijedor 500 internet pretplatnika na teritoriji Prijedora.

Obzirom da je utvrđeno da postoje neslaganja u pogledu broja internet pretplatnika navedenih pri podnošenju Prijave i u dostavljenom dopisu, Konkurencijsko vijeće je od RAK-a zatražilo podatke o broju internet pretplatnika učesnika koncentracije i njihovih konkurenata za 2007. godinu.

Prema podacima RAK-a, koji su dobijeni od privrednih subjekata Aneks d.o.o. Banja Luka i Ki sistemi d.o.o. Prijedor u redovnoj godišnjoj anketi za 2007. godinu, privredni subjekt Aneks d.o.o. Banja Luka je zajedno sa svojim povezanim privrednim subjektom Blic.Net d.o.o. Banja Luka u 2007. godini imao ukupno 27.168 internet pretplatnika, a privredni subjekt Ki sistemi d.o.o. Prijedor 2.500 internet pretplatnika.

Slijedom navedenog, privredni subjekt Aneks d.o.o. Banja Luka je pri podnošenju Prijave, a kasnije i u dopuni Prijave naveo netačne podatke o broju internet pretplatnika učesnika koncentracije za 2007. godinu, koji se znatno razlikuju od zvaničnih podataka RAK-a.

Zakonom i Odlukom o načinu podnošenja prijave i kriterijumima za ocjenu koncentracija privrednih subjekata podaci koji se dostavljaju Konkurencijskom vijeću moraju biti tačni, a Konkurencijsko vijeće samo na osnovu tačnih podataka, može odrediti tržišna učešća učesnika koncentracije, koji predstavljaju odlučujuće elemente za analizu relevantnog tržišta i ocjenu dopuštenosti predmetne koncentracije.

Obzirom da su podaci dostavljeni od Podnosioca prijave netačni, Konkurencijsko vijeće je na osnovu člana 49. stav (1) tačka c) i stav (2) Zakona izreklo novčanu kaznu privrednom subjektu Aneks d.o.o. Banja Luka u iznosu od 15.000,00 KM, što predstavlja oko 0,1% od ukupnog godišnjeg prihoda iz 2007. godine, i odgovornom licu, direktoru Antonijević Nebojši, novčanu kaznu u iznosu od 5.000,00 KM.

Konkurencijsko vijeće je odredilo novčanu kaznu imajući u vidu činjenicu da kažnjavanje Podnosioca prijave nije prvenstven cilj, već izrečena novčana kazna ima za cilj upozoriti na obavezu primjene Zakona o konkurenciji.

9. Administrativna taksa

Podnosilac Prijave na ovo Rješenje, u skladu sa članom 2. stav (1) tarifni broj 107. tačka d) pod 1) Odluke o administrativnim taksama u vezi sa procesnim radnjama pred Konkurencijskim vijećem („Službeni glasnik BiH“, broj 30/06) je dužan platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

10. Pouka o pravnom lijeku

Protiv ovoga Rješenja nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Rješenja.

Predsjednik

Ibrica Lakišić

Dostaviti:

- **podnosiocu Prijave – advokat Sead Miljković, Fra Anđela Zvizdovića 1, 71000 Sarajevo**
- **u spis**
- **arhiv Konkurencijskog vijeća**